

Sokongan padu!

■ Kebanjiran penonton mampu lonjak semangat pemain



Aida Adilah Mat

aida_adilah@hmetro.com.my

Serdang

Ikon skuasy negara Datuk Nicol David optimis pemain yang mewakili negara ke temasya Sukan SEA bulan depan mampu mempamerkan aksi terbaik sekali gus menyapu bersih kesemua tujuh emas dipertandingkan.

Katanya, atlet skuasy negara sudah bersedia dari segi fizikal dan mental dan mereka antara pemain terbaik Malaysia ketika ini.

Biarpun tidak akan beraksi pada temasya dwitahunan itu, atlet berusia 33 tahun itu memohon sokongan penyokong untuk hadir menyaksikan pemain negara beraksi.

“Pasukan skuasy kita

yang terkuat dan pencabar utama untuk pingat.

“Saya yakin mereka akan memberi yang terbaik untuk meraih semua emas dipertandingan,” katanya ketika ditemui pada sidang media pelancaran Program Transformasi Kepimpinan Sukan Anjuran Akademi Sukan Universiti Putra Malaysia (UPM) dan Sports Warrior Global.

Mengulas mengenai program berkenaan Nicol berkata, dia gembira apabila program yang dibentangkan kepada Kementerian Pendidikan Tinggi (KPT), Februari lalu mendapat reaksi positif.

Katanya, dia percaya melalui program seperti itu akan dapat merealisasikan impian melahirkan bakal pemimpin dalam kalangan pelajar seperti mana visi KPT itu sendiri.

“Sukan mampu membentuk nilai kepimpinan tinggi dan bagaimana kita menggunakannya di peringkat universiti dan seterusnya dalam karier akan menjadikan seseorang itu lebih baik.

“Sudah terbukti, sukan mampu menjadikan se-

orang atlet itu pemimpin lebih berkualiti dan sebenarnya ia adalah platform untuk menghasilkan barisan kepimpinan terbaik,” katanya.

Program Transformasi Kepimpinan Sukan itu menyasarkan penuntut UPM menjadi tokoh pemimpin berkaliber dalam bidang sukan di masa depan.

Ia akan dilaksanakan melalui modul latihan yang disusun dari peringkat asas hingga ke modul utama, antaranya paradigma pengurusan badan sukan tempatan dan antarabangsa serta strategi dalam sukan selain program usaha sama bersama persatuan sukan kebangsaan.



MENTERI Pengajian Tinggi, Datuk Seri Idris Jusoh (kanan) bersama Nicol di stadium UPM.